



### La Arge Alp puspè en mauns grischuns

La forza idraulica stat en il center dal presidi grischun da la Arge Alp cun Janom Steiner a la testa.

2



### Il Spöl vegn nettegià

Las substanzas nuschaivlas da lavurs da construcziun en la part sura dal Spöl vegnan allontanadas.

8

südostschweiz

# LA QUOTIDIANA

Redacziun: Via Sommerau 32, 7007 Cuira, tel. 081 255 57 10, redacziun@laquotidiana.ch

## Excellentas posiziuns

Fiastas da diplomaziuns a Glion

■ (anr/abc) Ei seigi in mument impurtont ella veta dils juvenils, han ils recturs rendiu attent. Il Center da formaziun Surselva ha envidau allas fiastas da diplomaziuns a Glion. Igl imprendier hagi purtau fretg, tut ils absolvents hagian finiu ils examens cun success, ha Alois Derungs saviu annunziar. Ell'aula dalla casa da scola a Glion ha el surdau ils diploms federals da habilitad professiunala a 41 emprendistas ed emprendists. Quels han absolviu alla scola professiunala industrialia a Glion lur instrucziun dil fatg ni/ quella dils roms generals tenor il sistem da splitting cun Cuera. Culla megliera nota dalla scola ha il bostger Janic Alig da Vella absolviu ils ex-

mens. Derungs ha engraziu al president communal dad Ilanz/Glion, alla Regiun Surselva ed als deputai sursilvans pils sforzs che la Regiun Surselva ha fatg per che quell'instituziun resti a Glion. In'ura avon ei l'aula digl institut s. Giusep ella claustra da Glion s'emplenida. Leu ha la Scola mercantila Surselva surdau 49 diploms allas absolventas ed als absolvents dalla Scola professiunala commerciala, la Scola media mercantila e la Scola media propedeutica Surselva. Excellentas premissas per siu futur professiunel ha Denis Marmy tschentau. El ha finiu igl examen dils emprendists dil commerci da detagl culla nota 5,7.

> PAGINA 4

## In pign object cun grond effect

Schluein e Glion han inauguru la punt sul Rein

DAD AUGUSTIN BEELI / ANR

■ Ils vitgs da Schluein e Castrisch ein uss in tec pli datier in da l'auter. Sonda han ils patruns da baghegiar dalla punt sul Rein inauguru igl object culla populaziun. Enteifer ils meins ch'ella seigi aviarta hagi quei object gudiu massa simpatia. Ins sappi buca pli s'imaginar la cuntrada senza quella colligiaziun sul Rein, ha il president communal da Schluein, Bruno Wellinger, getg en siu plaid. Culla preschientscha da cusseglier guvernativ Jon Domenic Parolini, il schef dall'economia e dil turissem grischun, ha l'occurrenza giu ina muntada speciala. Il piogn sul Rein denter Schluein e Castrisch ha custau «mo» 2,1 milliuns francs, da quei ha il cantun finanziau ina tiarza. Sco il cusseglier guvernativ ha confirmau en siu cuort salid seigi ei impurtont da sustener il turissem cun projects effectivs sco quella punt nova. Per la regiun dalla Foppa ha la pintga ovra ina gronda muntada per pedunzs e ciclists. Christian Theus, il president dall'Uniu-



La punt nova ei la quarta che colligia ella Ruinaulta las rivas dretg e seniester dil Rein.

FOTO A. BEELI

Ruinaulta, ha manegiau ch'ei hagi duvrau biars nunconformists per realisar quei project, denton negins tgaus dirs. Aurelio Casano-

va, il president communal dad Ilanz/Glion, ha confirmau che la punt nova seigi pilver buca da muntada existenziala. Tuttina sei-

gi ella d'impurtonza, ella seigi in crap da mosaic ella reit dil traffic.

> PAGINA 3

## Be ina victoria era pussaivla

■ (anr/gns) Sco gia avant in onn a Flem gudogna Armon Orlik er a S-chanf l'occurrenza da lutga grischuna-glarunaisa 2017. Per defender quel titel è però stada necessaria en la lutga finala ina victoria cunter Roger Rychen, il Glarunais. Suenterschintg lutgas era el anc a la testa da la rangaziun intermedia-ra. Sper Armon Orlik han den-

tant er anc otg ulteriurs lutgaders grischuns fatg il cranz. Grazia a la lavur seriusa dals 100 voluntaris e dal comité d'organiziun cun Andrea Gilli al timun è la festa daventada ina vaira avventura da sport sonda a S-chanf cun 2000 aspectaturs e 140 lutgaders.

> PAGINA 2



Armon Orlik (a san.) durant la lutga finala cunter Roger Rychen. KEYSTONE

## Il lenn en Casa Melna

■ (anr/abc) Il lenn cun tut sias facettas ei el center en Casa Melna. Tgi che entra leu per mirar l'exposiziun vegn retscharts da Rudolf Olgiati. El ei leu, semuenta denton buc. Pertgei igl ei ina sculptura da lenn-larisch fatga en connex cull'aziun naziunala «Woodvetia». Rudolf Olgiati, quel che scheva adina ch'ei seigi donn da fierer naven objects da lenn. Ellas treis alzadas dalla Casa Melna san ins s'informar e seconfruntar cul product «lenn».

> PAGINA 3

## Crappa privata

90 rimnaders muossan lur «scazis» a Lumbrein

■ (anr/abc) Sonda ha l'exposiziun entschiet. Il curatur hospitant, igl Appenzelles H. R. Fricker, ha saviu luvrar cun 300 differents objects. Il cristagl gigant dil Péz Regina ha questa stad cumpignia. Sonda ha la Fundaziun da cultura Lumnezia inauguru la tiarza exposiziun speciala. La menadra dalla casa, Anne-Louise Joël, ha saviu bene-

ventar ina massa glieud. La fundaziun ha surdau uonn a Hans Ruedi Fricker, igl artist concepziunal appenzelles, l'incumbensa da crear ina exposiziun tier la tematica «crappa/Steine». Las 90 personas che han dau giu crappa per l'exposiziun speciala representan la fascinaziun ch'il crap ha pil carstgaun. Ella Casa d'Angel setransforma crappa cumina en

ovras d'art. Ins empen d'enconuscher tocs dalla natira e s'encor-scha che crappa s'auda atgnamein tier nies mintgagi. Crappa da tuttas fuormas, colurs e substanzas ei exponida. In vast program da tuttas uisas accumulogna quell'interessanta e fascinonta exposiziun speciala a Lumbrein.

> PAGINA 5



In dils craps pli gronds ch'ei exponi: Igl ei in bloc ch'in rimnader ha anflau a Vella.

FOTO A. BEELI

## «Sablun» da Dumenic Andry

■ (anr/afi) D'incuort ha preschantà la Chasa Editura Rumantscha sia 50avla publicaziun: «Sablun» da Dumenic Andry. Las 78 poesias laschan scuvrir al lectur surpraisas e misteris. Ellas drivan ils ogls per robas chi paran banalas sco il sablun suot ils peis. Sablun in fuorma sutta es per l'autur, chi abita a Zuoz, üna roba antipatica. «D'uffant vaiv'eu adüna la tendenza da masdar il sablun cun aua e da

far ün masdügl e da pastrügliar», ha'l manzunà. Dürant bundant 15 ons ha'l fuorma e laschà madüra sias poesias. Il cunfin tanter il mar e la riva, staziuns da viafier o ils agens sömmis fuorman la basa per sias ouvras da pacs plets. L'ambiziun d'Andry es da dir alch in ün möd cuort, da giovar e da fuormar bellas robas culs plets.

> PAGINA 7

## Traversà il territori da Sent

■ (anr/afi) Fingjà per la 16avla vouta ha gnü lö in sonda la Traversada da Sent. 102 partecipants han traversà il territori da Sent dal nord vers süd. L'intent da quist arrandschamaint es amo adüna listess sco avant 30 ons. Ils iniziants voutan spordscher üna spassegiada da Fenga fin illa Chamonna Sesvenna e quai sainza squitsch da temp. La lunghezza dal trajet da chaminar es 34,5 kilometers cun üna differenza d'ottezza da 1670 meters.

> PAGINA 7



10027

Servetsch d'abunents e da distribuziun: tel. 0844 226 226 mail: abo@somedia.ch